



List Saveza lovačkih društava Tuzlanskog kantona

Lovac

Broj 90

Tuzla, juni/lipanj 2021.

Cijena 1,00 KM

*Dobar
pogled
na
sundaća*





Lovac

List Saveza lovačkih društava
Tuzlanskog kantona

Izlazi tromjesečno

Izdavač:
Upravni odbor Saveza lovačkih društava
Tuzlanskog kantona

Za izdavača:
Mensur Alić,
predsjednik UO SLD TK

Redakcija lista "Lovac":
Enver Kurtić (Kalesija)
Siniša Vareškić (Tuzla)
Damir Abdulahović (Banovići)
Nusret Kamenjaković (Zivinice)
Ismet Memić (Sapna)
Edin Saletović (Srebrenik)
Miralem Džedović (Gradačac)
Hajrudin Imširović (Teočak)
Senad Selimbašić (Kladanj)
Faruk Huskanović (Gračаница)
Denijal Fajić (Lukavac)
Almir Suljkanović (Doboj-Istok)
Faruk Mehanović (Čelić)

Glavni i odgovorni urednik:
Mensur Alić

Urednik i lektor:
Prof. Mirzet Ibrišimović

Stručni saradnik:
Selver Pirić

Fotoliti:
B Concept Sarajevo

Priprema i štampa:
"Mikroštampa" Tuzla

Za štampariju:
Šaban Cipurković

Adresa redakcije "Lovac"
Tuzla, Džindić mahala 13.
Tel./fax: 035/258-004
Web site: www.lovactk.com
E-mail: info@lovactk.com

Račun kod Tuzlanske banke d.d. Tuzla
132-100-03092192-27

Na osnovu mišljenja Ministarstva
za obrazovanje, nauku, kulturu, sport
i informisanje Vlade TK broj
10/1-452-25-2/98 od 28. 08. 1998. god.,
list "Lovac" oslobođen je dijela
poreza na promet



8. juni – Dan planinske prirode

Planine zauzimaju oko petinu svjetskog kopnenog područja i osnovni su životni resursa poput pitke vode, energije i biološke raznolikosti, a o njezinoj svježoj vodi danas posredno ili neposredno ovisi više od polovine svjetskog stanovništva. Procesi globalizacije, urbanizacije i masovnog turizma prijetnja su planinskoj prirodi i izvorima koji o njima ovisi čovjek. Rastući ekonomski pritisak uništava planinske ekološke sustave. Pustošenje šuma, neprikladna poljoprivreda i neplanski infrastrukturni razvoj (prekomjerna eksploatacija) te prijetnja klimatskih promjena pridonose narušavanju zdravlja okoliša i gubitku biološke raznolikosti. Dan planinske prirode afirmira aktivnosti očuvanja planina, planinskog ekološkog sustava u cilju unapređivanja života ljudi. U svemu tome važnu ulogu imaju lovci jer je priroda mjesto njihovog neposrednog djelovanja, gdje se spaja ljubav prema prirodi i ekološka svijest, fizički i duhovni rast. Lov je najstarija djelatnost čovjeka koja je oblikovala odnose među ljudima, uređivala ih i usmjeravala u njihovim zajednicama u nepisane društvene norme. U evoluciji čovjeka najduži dio pripada stvaranju lovačke kulture. Kroz historiju čovječanstva, lovstvo je bilo sastavni dio svakodnevnih društvenih odnosa i odraz općeg kulturnog pravca. Zato su lovci, kroz različite lovačke etičke norme, najpozvaniji da se uhvate u koštac s ekološkim nevoljama i prijetećoj ugroženosti prirode i divljači. Otuda je i motiv lovstva da ublažava otuđenost ljudi od prirode i kroz razne aktivnosti pomažu održivosti zdravog okoliša, njeguju tradicionalne moralne vrijednosti i svijest da je drevna lovna kultura dio našeg identiteta.

To prije svega znači da su lovačka društva dužna da osiguravaju održivo korištenje prirodnih dobara i sprečavaju štetne zahvate i poremećaje u prirodi, dužna vršiti aktivnu zaštitu prirode i staništa divljači, pošumljavati, uzgajati, štiti, prihranjivati divljač, racionalno koristiti divljač odstrjelom po polnoj i starosnoj strukturi koji je uravnotežen s prirastom, a sve zasnovano na načelu dobrog gazdovanja i etičke samokontrola svakog lovca ponaosob, na način da doprinosi i očuvanju biološke i pejzažne raznolikosti, ekološkog naslijeđa i zaštiti prirodnih vrijednosti. Budući da su raznovrsne ljepote prirode najbolje sačuvane u planinama logično je i da su lovci najbolji da afirmiraju značaj planina i njihov održiv razvoj za očuvanje kvalitetnog života na Zemlji. Prirodna bogatstva i ljepote planina izvor su iz kojeg lovci crpe snagu i nalaze motive za svoj rad. Razumljivo je zato da lovci s većom osjetljivošću posmatraju promjene u okolišu i osjećaju veću potrebu za ekološkim djelovanjem i za podizanjem svijesti o važnosti planina za život, isticanjem potencijala ili otežavajućih okolnosti za razvoj planinskog resursa, kao jednog od najznačajnijih resursa Bosne i Hercegovine.

Myko In San



Upravni odbor SLD TK

U prostorijama restorana „Panonski lovac“, 29. aprila 2021. godine, održana je 120. sjednica Upravnog odbora SLD TK, kojom je predsjedavao Mensur Alić - predsjednik SLD TK i na kojoj su članovi Upravnog odbora, u okviru 15 tačaka dnevnog reda, razmatrali Izvještaj o radu UO SLD TK za 2020. godinu, Plan rada i aktivnosti SLD TK za 2021. godinu, Izvještaj o finansijskom poslovanju SLD TK za 2020., Plan o finansijskom poslovanju SLD TK za 2021. godinu, kao i izvještaje o radu organa Saveza za 2020. i planove rada za 2021. godinu. Razmatran je i usvojen Operativni kalendar aktivnosti u lovištima TK za lovnu 2021./22. godinu. Dogovoreno je da se nastave aktivnosti na pisanju Monografije u povodu 25. godina postojanja i rada SLD TK.

Donesena je i Odluka o imenovanju savjeta i komisija UO SLD TK za period 2020.-2024. godina:

Savjet za lovstvo

1. Čorbić Seid, dipl. ing. šum.
2. Selimbašić Senad, dipl. ing. šum.
3. Mehmedović Samed, dipl. pravnik
4. Hodžić Refik, dipl. ing. šum.

5. Mahmutović Galib, mr. šumarstva
6. Modrić Enes, dipl. ing. šum.
7. Mehanović Faruk, predsjednik LD „Vjetrenik-Šibošnica“ Čelić
8. Mahmutović Elvir
9. Mujagić Zijad, glavni lovovođa LD „Svatovac“ Lukavac

Savjet za kinologiju

1. Mehanović Faruk, kinološki sudija
2. Halilović Emir, kinološki sudija
3. Alić Galib, dr. vet. med.
4. Abdulahović Šefik, odgajivač
5. Delić Eldar, kinološki sudija

Vođa uzgoja pasa

1. Delić Eldar

Komisija za streljaštvo

1. Kovačević Nikola
2. Dedić Muhamed
3. Karamović Salih
4. Jašarević Armin
5. Imamović Zlatan

Komisija za priznanja i odlikovanja

1. Huskanović Faruk, dipl. pravnik
2. Mehmedović Samed, dipl. pravnik
3. Salihović Ibrahim

U skladu s Pravilnikom o priznanjima i odlikovanjima za rad na unapređenju lovstva u Tuzlanskom kantonu, u svrhu zasluga i u cilju stimuliranja razvoja i afirmiranja lovstva i drugih aktivnosti koje su od općeg interesa za lovstvo, na prijedlog članica Saveza i Komisije za priznanja i odlikovanja, Upravni odbor je donio odluke da se u okviru lovačkih društava dodijele lovačka priznanja i odlikovanja:



LD „Toplica“ ŽIVINICE

Lovačka bronzana značka:

Turalić Nermin, Trakić Šefik, Šišić Mensur, Svrakić Mevludin, Rizvić Emin, Ramić Hariz, Puzić Izet, Muminović Amir, Mujanović Muamer, Mazić Mersudin, Kadirić Hasan, Hodžić Mujo, Hasić Irfan, Fočaković Zijad, Akšamović Mirnes, Đogić Alija, Durić Bajro, Buševac Meho, Brčaninović Damir, Aličić Zijad i Brčaninović Samir.

Lovačka srebrna značka:

Taletović Edin, Suljić Mirsad, Spahić Mervan, Smajić Hazim, Salihović Asmir, Omerkić Alis, Nišić Midhat, Nišić Jasim, Muratović Muhamed, Muratović Edin, Mulavdić Elvis, Kujuković Hajrudin, Kalajevac Šaban, Idrizović Izet, Ibrahimović Fahir, Husejnović Lutvo, Hrvić Šaban, Hodžić Refik, Hasanović Rašid, Hamzić Fahir, Halilović Džemo, Ferhatović Režef, Fehrić Hasan, Đerzić Asmir, Džihanović Nihad, Durić Muhamed, Brčaninović Rahman, Brčaninović Nusret, Bajrić Halid i Adanalic Admir.

Lovačka zlatna značka:

Mazić Ibrahim, Salihović Zijad, Nukić Šekib, Jusić Suvad, Jusić Halid, Jahić Muharem, Jahić Amir, Goletić Selim, Džankić Damir, Durić Šemsudin, Bošnjaković Amir, Ahmedović Dževad, Halilović Ekrem i Goletić Zehrudin.

Lovačka diploma počasnog člana:

Smajlović Kasim, Selimović Safet, Pekmić Sead, Nukić Mirzet, Muminović Emin, Mazić Hajrudin, Kulić Ivo, Konjević Huska, Kamenjaković Samir, Bajrić Bajro, Antić Andrija i Jusić Ševket.

Plaketa SLD TK:

Beat BH d.o.o Živinice, Doo Adoplast Živinice, Doo Grga prom Živinice, Korektbau doo vl. Mušić Senad, Mapex doo Živinice, Se-Sarajka doo Živinice, Doo Terakop Živinice, Džas-Trans doo Živinice, Media Sky doo Živinice, Zukić Abdulah, Zimex doo Živinice, Udruženje građana 4X4 Kočarin Živinice, Šakić Mustafa - ministar za PŠV TK, Alić Mensur - predsjednik SLD TK Pirić Selver - sekretar SLD TK, Jusić Nail predsjedavajući Gradskog vijeća Grada Živinice, VEREN Stan doo Živinice, Kamenjaković Nusret - predsjednik LD „Toplica“ Živinice.

LD „Majevica“ Srebrenik

Lovačka diploma počasnog člana:

Mehmedović Samed

Selver Pirić
Sekretar SLD TK



Skupština SLD TK

Dvadeset i šestog maja ove godine, u restoranu „Panonski lovac“ u Tuzli, održana je redovna izvještajna Skupština SLD TK, kojom je predsjedavao Mensur Alić - predsjednik UO SLD TK i na kojoj su delegati članica Saveza, u okviru 11 tačaka dnevnog reda, razmatrali i usvojili Izvještaj o radu Upravnog odbora SLD TK za 2020., Plan rada Upravnog odbora SLD TK za 2021., Izvještaj o finansijskom poslovanju SLD TK za period 1. 1. - 31. 12. 2020., Plan finansijskog poslovanja SLD TK za period 1. 1. - 31. 12. 2021., Izvještaj Nadzornog odbora o materijalno-finansijskom poslovanju SLD TK za 2020., Izvještaj o radu Savjeta za lovstvo za 2020., Plan rada Savjeta za lovstvo za 2021., Izvještaj o radu Savjeta za lovnu kinologiju za 2020., Plan rada Savjeta za lovnu kinologiju za 2021., Izvještaj o radu Komisije za lovno streljaštvo za 2020. i Plan rada Komisije za lovno streljaštvo za 2021. godinu.

Selver Pirić
Sekretar SLD TK



Savez lovačkih društava Tuzlanskog kantona

Prve kinološke aktivnosti



Nakon što je odobren Plan rada za 2021. godinu, od strane Bosanskog kinološkog saveza, započele su redovne kinološke aktivnosti u SLD TK. Ove manifestacije uvijek pobuđuju veliku pažnju lovaca jer na njima ljepotu i vještinu pokazuju njihovi najvjerniji pomagači u lovu. Na fotografijama su učesnici redovne smotre pasa u Čeliću i učesnici na ispitu prirodnih osobina u Gračanici. Još jedna od značajki ovih manifestacija je i učešće ne samo lovaca sa lokalnog područja nego i iz drugih lovačkih društava, članica SLD TK, a ovom prilikom, dakle na prvim ovogodišnjim i odlično organizovanim kinološkim manifestacijama, izdvajam Čelić, Gračanicu, Lukavac, Banoviće, Živinice Doboj Istok i Sapnu.

Selver Pirić
Sekretar SLD TK



SAVEZ LOVAČKIH DRUŠTAVA TUZLANSKOG KANTONA

OPERATIVNI KALENDAR AKTIVNOSTI U LOVIŠTIMA TK ZA LOVNU 2021./2022. GODINU

I UKLANJANJE ŠTETOČINA IZ LOVIŠTA

1. REDUKCIJA BROJNOG STANJA PASA I MAČAKA KOJI SE NEKONTROLISANO KREĆU PO LOVIŠTIMA (LUTALICE)

- maj	2, 9, 16, 23, 30
- juni	6, 13, 20, 27
- juli	4, 18, 25
- avgust	1, 8, 15, 22, 29
- septembar	5, 12, 19, 26

Redukciju brojnosti pasa i mačaka koji se nekontrolisano kreću po lovištima obavljati je u sve lovne dane predviđene Operativnim kalendarom aktivnosti.

U slučaju nabavke i vještačkog unosa divljači u lovište, obaveza je da se prethodno izvrši uklanjanje svih pasa i mačaka koji se nekontrolisano kreću po lovištima, i ostalih štetočina i izvan utvrđenih dana, uz odluku lovačkog društva.

Redukciju brojnog stanja pasa i mačaka koji se nekontrolisano kreću po lovištima, vršiti u skladu s članom 13. Zakona o zaštiti i dobrobiti životinja.

Lovočuvari su obavezni da vrše redukciju brojnosti pasa i mačaka koji se nekontrolisano kreću po lovištima svaki dan, na način kako je to propisano Zakonom.

2. ODSTRJEL LISICA, DIVLJIH MAČAKA I ŠAKALA

- oktobar	10, 17, 24, 31
- novembar	7, 14, 21, 25, 28
- decembar	5, 12, 19, 26
- januar 2022.	1, 2, 9, 16, 23, 30
- februar 2022.	6, 13

Ove aktivnosti obavljati isključivo nedjeljom. Poslije 5. januara je dozvoljen lov lisica, divljih mačaka i šakala, bez upotrebe lovačkih pasa.

II LOV LOVOSTAJEM ZAŠTIĆENE DIVLJAČI

1. LOV SRNEĆE DIVLJAČI

Na osnovu prijedloga članica Saveza i Savjeta za lovstvo, preporučuje se odstrjel sanitarnog i uzgojnog karaktera:

- juni	12, 13, 26, 27
- juli	3, 4, 17, 18
- avgust	7, 8, 14, 15, 28, 29
- septembar	4, 5, 11, 12

Napomena: Izlaske na srnađe organizovati:

Subotama izlasci za odstrjel: juni 12 i 26, juli 3 i 17, avgust 7, 14, i 28, septembar 4 i 11. Nedjeljama jutarnji izlasci za odstrjel: juni 13 i 27, juli 4 i 18, avgust 8, 15 i 29, septembar 5 i 12. Ulazak u lovište je subotom u 14 sati, izlazak iz lovišta je u nedjelju u 14 sati.

Sanitarno-uzgojni odstrjel srna i lanadi

Lovačka društva, radi postizanja optimalne trofejne vrijednosti i održavanja zdrave populacije srneće divljači, imaju obavezu organizovati sanitarno-uzgojni odstrjel ženki i lanadi srneće divljači u periodu od 1. oktobra 2021. do 31. januara 2022. godine.

2. LOV DIVLJIH SVINJA

- septembar	26
- oktobar	3, 10, 17, 24, 31
- novembar	7, 14, 21, 25, 28
- decembar	5, 12, 19, 26
- januar 2022 (vepar i nazime)	1, 2, 9, 16, 23, 30
- februar 2022 (vepar i nazime)	6, 13

Vepra je dozvoljeno odstrjeliti u sve lovne dane tokom godine predviđene Operativnim kalendarom.

Poslije 5. januara je zabranjen lov sa psima bez obzira na vrstu i rasu.

Ovu aktivnost obavljati po grupama od po minimalno 10 lovaca, u koji broj ne ulaze pripravnici i gosti.

U januaru 2022. godine je dozvoljen odstrjel samo veptra i nazimadi (od 5. januara, bez lovačkih pasa).

U slučaju odstrjela, grupa je dužna izvršiti uplatu na ime odstrjelne takse, ukoliko ista nije uplaćena akontativno, bez obzira na zdravstveno stanje ulova.

Upozoravaju se lovačka društva da su obavezna izvršiti veterinarski pregled svake ulovljene divlje svinje.

Važna napomena: Kod odstrjela krupne divljači (divlja svinja) upotrebljavati lovačko oružje s užljebljenim cijevima. Izuzetno, pri odstrjelu divlje svinje je dopuštena upotreba jediničnog zrna iz lovačke puške sačmarice, a najveća dopuštena daljina gađanja je 40 metara (Pravilnik o načinu upotrebe lovačkog oružja i naboja, „Službene novine FBiH“, broj 5/08).

3. LOV ZEČEVA

Preporuka Savjeta za lovstvo je da se ne organizuje lov na ovu divljač s obzirom na smanjenu brojnost, a ako se lovačka društva ipak odluče da love, aktivnosti obavljati u sljedeće dane:

- oktobar	10, 24
- novembar	14, 25

4. LOV FAZANA

- oktobar	10, 17, 24, 31
- novembar	7, 14, 21, 25, 28
- decembar	5, 12, 19, 26
- januar 2022.	1, 2

Lov fazanske divljači mogu planirati lovačka društva koja su u svoja lovišta unijela ovu vrstu divljači, i to u dane kako je navedeno u Operativnom kalendaru aktivnosti. Ovu vrstu divljači loviti isključivo sa odgovarajućim psima.

5. LOV KUNA I VUKOVA

- oktobar	10, 17, 24, 31
- novembar	7, 14, 21, 25, 28
- decembar	5, 12, 19, 26
- januar 2022.	1, 2, 9, 16, 23, 30

Vukove mužjake je dozvoljeno odstrjeliti u sve lovne dane tokom godine, predviđene Operativnim kalendarom. Kune zlatice se ne mogu loviti u oktobru. Obje kune se mogu loviti nedjeljom od 28. februara 2022. godine, prilikom organizovanja akcija odstrjela štetočina.

6. LOV MEDVJEDA

Na utvrđenom uzgojnom području je dozvoljeno vršiti samo ukoliko se od strane nadležnog organa donese program upravljanja mrkim medvjedom na uzgojnom području i ako se ukaže potreba u svrhu komercijalnog lova u Pravilnikom određeno vrijeme, od 1. oktobra do 31. decembra 2021. godine i od 1. marta do 31. marta 2022. godine, a prema planu gazdovanja u LD „Sokolina“ Kladanj, LD „Zelemboj“ Banovići i LD „Toplica“ Živinice, kao i u ostalim lovištima ako se pojave štete od medvjeda, uz obavezu izdavanja lovne dozvole i prijave odstrjela Savezu lovačkih društava TK.

7. LOV TETRIJEBE

Zbog ugroženosti vrste nije planiran lov ove divljači u lovištima na području Saveza lovačkih društava TK.

8. LOV DIVOKOZA

Ukoliko postoje uslovi i potreba, LD „Sokolina“ Kladanj može organizovati lov u periodu od 5. septembra. do 26. decembra. 2021. godine.

9. LOV DIVLJIH PATAKA, GUSAKA I CRNIH LISKI

Divlje patke loviti u periodu od 5. septembra. 2021. do 27. februara 2022. godine, nedjeljom i drugim danima koje odredi korisnik lovišta.

Divlje guske loviti u periodu od 5. septembra 2021. do 31. januara 2022. godine (nedjeljom i drugim danima koje odredi korisnik lovišta), a crnu lisiku loviti od 5. septembra 2021. do 31. januara 2022. godine, samo nedjeljom i to na jezerima Modrac, Sniježnica i drugim manjim vodenim površinama, u skladu sa Zakonom o lovstvu. Preporučuje se lovačkim društvima koja gravitiraju jezeru Modrac da usklade dane lova na ovu vrstu divljači.

Lovačka društva koja nemaju jezera mogu loviti ovu vrstu divljači na rijekama i na drugim vodenim površinama, isključivo nedjeljom i u dane kad se lovi druga niska divljač, uz poštivanje odredaba upotrebe naoružanja na udaljenosti od naselja, u skladu sa Zakonom.

10. LOV PREPELICA I GOLUBOVA GRIVNJAŠA

Lov prepelica i golubova grivnjaša obavljati u periodu od 1. avgusta. do 26. decembra 2021. godine.

11. LOV ŠLJUKA

Ova vrsta divljači može se loviti u periodu od 10. oktobra 2021. do 27. februara 2022. godine.

III NAPOMENA

Lovačka društva su dužna da kod organizacije lova i određivanja visine odstrjelne takse koja je određena cjenovnikom, primjene član 62. Zakona o lovstvu i Cjenovnik odstrjela i korištenja divljači i drugih usluga u lovištu („Službene novine Federacije BiH“, broj 12/09.)

IV UPOZORENJE

1. Upozoravaju se lovačka društva da je, u periodu do 1. aprila do 31. jula 2021. godine i od 5. januara do 31. marta 2022. godine, zabranjeno izvođenje lovnih pasa u lovišta (osim žrtvovanih terena), bez obzira na vrstu, rasu i eventualnu specijalnost.

2. Upozoravaju se sva lovačka društva da se prilikom obavljanja lova striktno pridržavaju zakonskih propisa u pogledu dozvoljenog naoružanja kojim se lovi, kao i obilježja koja nose učesnici lova, a sve u cilju poštivanja zakonskih propisa i izbjegavanja neželjenih posljedica.

3. Sva lovačka društva su obavezna da imaju minimalno jednog lovačkog psa KRVOSLJEDNIKA, ili drugog psa koji ima položen ispit u praćenju krvnog traga.

4. Sva lovačka društva su obavezna da tokom lovne sezone vode sve propisane evidencije, a naročito evidencije iz kojih se može utvrditi brojnost divljači u lovištima.

5. Operativni kalendar aktivnosti u lovištima Tuzlanskog kantona za lovnu 2021./22. godinu je okviran, a sve članice Saveza su dužne uraditi svoj kalendar aktivnosti za lovnu 2021./22. godinu, a koji ne može izlaziti iz okvira Operativnog kalendara aktivnosti SLD TK. Svi lovni dani navedeni u ovom Operativnom kalendaru ne moraju biti navedeni u lovnim kalendarima lovačkih društava.

6. Sva lovačka društva su obavezna da, kod organizacije lova i gazdovanja lovištima, primjenjuju Zakon o lovstvu i podzakonska akta, ukoliko nisu u suprotnosti s istim, kao i druge zakonske propise koji definišu oblast lovstva ili se tiču oblasti lovstva.

7. U slučaju potrebe, zbog pričinjavanja šteta, lovačka društva mogu donijeti odluku o određivanju dana za progon crne divljači, koja će vremenski biti u skladu s Pravilnikom o vremenu lova lovostajem zaštićene divljači.

Lovačko društvo „Sokolina“ Kladanj Poletarac u akciji

Tokom cijele godine, a posebno u proljeće, lovci izvršavaju moralnu i etičku obavezu uređujući i puneći solila, hranilišta, vodeći brigu i o drugim lovnoprivrednim objektima u lovištu. S obzirom da se naklonost prema lovstvu stiže od malena, tako i lovci LD „Sokolina“ Kladanj, lovci LS „Tuholj“, svoje poletarce izvode u lovište kako bi ih podučili raznim vještinama koje čine ljubav prema divljači i prirodi. Na fotografiji je mlađahni budući lovac Šarić Edvin.

Elvir Šarić



Lovačko društvo „Srndač“ Gračanica

Lov za počasne lovce

U Lovačkom društvu „Srndač“ Gračanica, u domaćinstvu Sekcije „Škahovica“, upriličen je lov za počasne članove Društva. Kako su istakli predsjednik LS Nurkić Edin i lovovođa LS Iljazović Amel, čast im je bila da ugoste najiskusnije i najstarije lovce. Dan je bio lijep tako da je lov protekao u idealnim uslovima. Domaćini su uspjeli da se kolege osjećaju veoma prijatno.

Amel Iljazović



Lovačko društvo „Jelen“ Gradačac Lovačko veče


Uz preduzete sve sigurnosne mjere zbog pandemije virusa Covid 19, Sekcija „Vučkovci“, početkom godine, uspješno je organizovala tradicionalno lovačko veče u restoranu „Ranč“. Zabavna lovačka večera je protekla uz pjesme, šale, viceve i prisjećanja na dogodovštine iz lova, a u svemu su prednjačili Kurbašić Safer i Nermin. Hrštić Admir, Ahmedbašić Mustafa, Bijelić Smajo...

Adil Turbić

Lovačko društvo „Srndać“ Gračanica

Nova hranilica i čeka

Sekcija „Škahovica“ u LD „Srndać“ Gračanica ima 28 aktivnih članova među njima i četiri mlada početnika koji će nastaviti biti u lovstvu po stopama svojih predaka, a to su Nurkić Hasan, Mulahusejnović Sulejman, Okić Anes i Smajlović Faris. Sekcija se može pohvaliti i novoizgrađenom



čekom za koju su najzaslužniji Iljazović Amel i njegov otac Hasan. U tekućoj godini realizirali su i postavljanje automatske hranilice.

Amel Iljazović

Lovačko društvo „Husić Mustafa Čektalo“ Sapna

Kukuruz i čičoka za divljač

U LD „Husić Mustafa Čektalo“ Sapna uspješno je obavljena sjetva kukuruza i čičoke za divljač na oko 50 dunuma, na prostoru kojim gazduje Društvo. U poslovima sjetve su učestvovali lovci iz svih 13 lovačkih grupa. Prethodno je njihova obaveza bila da lociraju najbolje zemljište za sjetvu i uzgoj čičoke i kukuruza za prihranu divljači. Troškove sjetve i nabavke sjemena, gnojiva i vode za prskanje snosilo je Društvo. Aktivnosti sjetve su nadzirali članovi Komisije LD „HMC“ Sapna koji su ustanovili da su svi poslovi urađeni po propisu.

Ibro Memić



Lovačko društvo „Husić Mustafa Čektalo“ Sapna

Lovište Munjača obogaćeno zečevima

Lovci „HMC“ SAPNA re realizovali su Projekt unaprjeđenja lovstva podržanog od Ministarstva poljoprivrede, šumarstva i vodoprivrede TK putem kantonalne Uprave za šumarstvo iz sredstva prikupljenih po osnovu Zakona o šumama, tako što su na 13 lokacija u lovištu Munjača Sapna pustili 26 divljih zečeva, a preostalih 56 će pustiti do kraja juna, a sve u cilju bogaćenja lovišta „svježom krvlju“ atraktivne lovne divljači.

Ibro Memić



Neke aktivnosti Lovačkog društva „Zelemboj“ Banovići



Opremanje lovačkog doma

Lovačko društvo „Zelemboj“ Banovići je prošle godine potpisalo Ugovor sa Ministarstvom poljoprivrede vodoprivrede i šumarstva iz oblasti unaprjeđenja lovstva pa je s dobijenim novčanim sredstvima opremilo lovački dom s 18 kreveta s madracima, jastucima i jorganima, kao i s 50 stolica i osam velikih stolova za salu. Takođe, po nalogu Federalne veterinarske inspekcije, kupilo je hladnjaču sa sabiralištem za uzimanje uzoraka mesa od divljači. Kupljena je od firme „Ordagić“ doo Srebrenik i postavili je uz lovački dom, koji je sad u potpunosti opremljen i spreman za lovni turizam. Nakon opremanja lovačkog doma, uz uložena znatna finansijska sredstva, anagažovana je firma A.I.SECURITY doo iz Živinica da uvede video nadzor na i u unutrašnjosti doma, radi bezbjednosti objekta. Sve su ovo aktivnosti koje će omogućiti da lovci Društva spremno dočekaju lov na srndaća.



Izgradnja spomen česme i ljetnikovca

U vrijeme pandemije Corona virusa lovci LD „Zelemboj“ Banovići aktivno su gradili i uređivali lovnouzojne i lovnotehničke objekte, a posebno su ponosni što su, na inicijativu LS „Grad“, u rejonu Bošnjevac (Revir I), izgradili ljetnikovac i hajr vodu za rahmetli lovce Lisičić Nezira zv. Neko, Oručević Osmana zv. Oruč i Beganović Seada zv. Sejo. Prvo je 50 lovaca taj teren poravnalo s mašinom i očistili od smeća kojeg su

ostavili nesavjesni izletnici. Izgradnja ljetnikovca je trajala dugo s obzirom da je objekt dimenzija 10x4 metra. Izlivena je ploča i urađen je veliki betonski sto dužine od osam metara. Oko stola su postavljene klupe, s kapacitetom od 40 lovaca. Krov je urađen



po savremenim standardima, s novom građom, i pokriven je sa limom. Potom je u blizini ljetnikovca urađena i uređena hajr voda. Dovedena oko 300 metara od izvorišta izvrsnog kvaliteta. Izgrađena je od kamena koji je prikupljen i dovezen s obližnje rijeke Krivaje. Na hajr vodu je postavljena mermerna ploča sa



slikama lovaca koji su dali veliki doprinos za Društvo. U tu svrhu su utrošena znatna novčana sredstva dobijena od Društva, pravnih lica i dobrovoljnim prilozima lovaca. Otvaranje ovih objekata je planirano u vrijeme početka lova na srdaća, kada će biti pozvani svi koji su dali svoj doprinos u izgradnji objekata, a druženje će biti organizovano uz tradicionalni lovački gulaš.

Mihret Herić

Sekretar LD „Zelemboj“ Banovići

2021 Juni Lovac 9



Neke aktivnosti Lovačkog društva „Spreča“ Kalesija

Piše: Damir Huremović

Skupština

Lovačko društvo „Spreča“ Kalesija je održalo Skupštinu po uputama nadležnog Ministarstva, a na kojoj je, između ostalog,

na osnovu redovnog prebrojavanja divljači, usvojen Plan gazdovanja za 2021-22. godinu, kao i Plan lova na srneću divljač. Usvojeni su i prijedlozi o dodijeli priznanja, odlikovanja i diploma za počasne lovce. Ono što je istaknuto je činjenica da je Društvo postalo bogatije za 25 novih lovaca, tako da sada ima 800 članova.

Sekcija „Rainci“


U sklopu Sekcije „Rainci“ djeluje Lovačka grupa „Saračić“ na čelu sa grupovođom Baručić Mehom, koji je ujedno i zamjenik predsjednika LS „Rainci“ od formiranja Sekcije. Grupovođa ističe da Grupa ima 14 članova, da je izgradila lovačku bajtu na lokalitetu Kajmačara, hranilište za crnu divljač u Huku i visoku



čeku na lokalitetu Krčevina. Mnoštvo izgrađenih solila, redovni obilasci terena, iznošenje soli i hrane u minulom periodu dali su očekivane rezultate. Također, Grupa je uradila i prosijecanje i nasipanje puta do lovačke bajte, u dužini od 300 metara. Za skori naredni period planirali su da izgrade još dvije visoke čeke i postave hranilicu za srneću divljač. Grupu krase izuzetna kolegijalnost i sloga te zajednička ljubav prema lovu i prirodi.

Sekcija „Seljublje“

Za lovce Sekcije „Seljublje“ se može reći da su čuvari Majevice u novim pohodima, naročito za lovce velike Grupe „Seljublje“, koji su pokazali i pokazuju veliku ljubav i odgovornost prema divljači u zoni svoje odgovornosti. Kao vrijedni i čestiti



domaćini u tokom zime su iznijeli veliku količinu kukuruza i soli, neophodne za zimsku prihranu divljači. Desetine solila i veliki broj hranilica koje su postavili kosom Majevice zadržalo je crnu ali i srneću divljač u dijelu kojim gazduje Sekcija. Grupovođa Smajić Emir je istakao da su, pored novoizgrađenih lovnotehničkih objekata, obnovili stare čeke i izgradili jednu novu u Ahmetovom dolu. Rezultati nisu izostali tako se lovačka sreća osmjehnula Mujkanović Jasminu, koji je odstrijelio vepra, a 15 dana poslije i kolegi Hadžić Eldinu. Trenutno je Grupa aktivna na pripremama za otvaranje lovne sezone na srneću divljač.

Sekcija „Kalesija“

U sklopu Sekcije „Kalesija“ djeluje Grupa „Gornja Kalesija“, koja ima 60 lovaca iz obližnjih zaseoka Panjevi, Pahunjak, Brda i Hrvačići. Na čelu Grupe dugo godina je Subašić Hajrudin Fičo. Grupa je podijeljena na četiri manje grupe: Pahunjak (grupovođa Nasupović Mustafa), Brda (grupovođa Križevac Fikret), Hrvačići (grupovođa Durgutović Hazim) i Gornja Kalesija (grupovođa Subašić Hajrudin). Kako je istakao Subašić Hajrudin u proteklom periodu si svi bili aktivni u izgradnji brojnih lovnotehničkih i uzgojnih objekata. Pored lovačke kuće Bukovica, koju su izgradili na lokalitetu rijeke Bukovice, u Sprečkom polju, na Osredku, izgradili su još jednu lovačku kuću. Grupa je izgradila devet visokih čeka, postavila je dvije




automatske hranilice i izgradila je više od 60 solila, zasadili su više od četiri dunuma kukuruza, što je u znatnoj mjeri doprinjelo prihrani divljači u proteklom zimskom periodu. Od matičnog Društva „Spreča“ Kalesija dobili su 600 kg kukuruza i oko 250 kg soli i iznijeli u lovište. Fičina Grupa se tako istakla u brojnim akcijama koje su direktno unaprijedile lov, zaštitu i očuvanje divljači. Član LG „Gornja Kalesija“ je i Beširević Ahmet, sekretar LD „Spreča“, lovac koji je kalesijskom lovstvu dao poseban doprinos, za što je nagrađen diplomom počasnog člana. U Grupi su svi aktivni, jednak doprinos svi daju, ali Fičo ističe dvojicu mladih lovaca Beširević Melisa i Beširević Ajdina. Prošle godine Grupa je dala najveći doprinos u organizaciji Dana lovaca Tuzlanskog kantona, naravno uz veliku pomoć matičnog Društva. Grupe „Brda i „Gornja Kalesija“, na lokalitetu Osredka, izgradili su lovačku kuću sa svim pratećim sadržajem. Pored kamina, terase i okućnice, uredili su i pristupni put. U



narednom periodu planirano je da se na kući uradi fasada, istakao je grupovođa Nasupović Mustafa. Iako je veliki dio lovaca na privremenom radu u inostranstvu, kada dođu na odmor iskoriste svaki slobodni trenutak da se uhvate posla oko kuće i svega čime mogu doprinjeti razvoju kalesijskog lovstva. U proteklom periodu izgradili su visoku čeki desetine solila i hranilište za crnu divljač. Sloga ono je što krase lovce ovih grupa.

Sekcija „Tojšići“

U sklopu Sekcije „Tojšići“ djeluje Lovačka grupa „Petrovice“. Grupa ima 20 članova a ističe se po aktivnostima na zaštiti divljači i izgradnji lovnotehničkih objekata. U skorom proteklom periodu u Vučijem gaju su izgradili lovačku kuću i nekoliko solila i hranilica za srneću divljač. Na lokalitetu Kose i Veresika su izgradili lovačke nadstrešnice koje se svojim izgledom uklapaju u prirodni ambijent. Visoku čeki su izgradili na Radakovcu, čime su poboljšali uslove za lov srneće divljači. U zimskom periodu su svi iznosili kukuruz i so pa je divljač lako i u velikom broju prezimila, čime su stvoreni bolji uslovi za proširenje areala divljači. Grupa planira da uskoro izgradi još jednu čeki na padinama Pješevice i da postave nove hranilice.





Lovačko društvo „Tuzla“ Tuzla

Sva lovišta obogaćena fazanima

Sve sekcije LD „Tuzla“ su sprovele akciju puštanja fazanske divljači. Lovišta su obogaćena sa 500 fazana, a akciji je prethodilo čišćenje terena od štetočina. Tako je Pirić Hazim, član LS „Tušanj“, na prostoru predviđenom za puštanje fazana, odstrijelio šakala, opaku prijetnju lovnjoj plemenitoj divljači (na fotografiji). Na drugoj fotografiji su lovci Sekcije „Simin Han“.

Selver Pirić



Lovačko društvo „Tuzla“ Tuzla

Prebrojavanje divljači

Ovogodišnja obavezna akcija proljetnog prebrojavanja divljači je obavljena na nivou cijelog Društva, u šest revira, uz učešće oko 1000 lovaca.

Selver Pirić



Lovačko društvo „Jelen“ Gradačac

Divlja svinja prekobrojna

Redovnim prebrojavanjem divljači, zapažanjem lovočuvara i lovaca Društva, utvrđeno je prekobrojno stanje crne divljači u lovištu Gradašnica. To je rezultiralo i povećanom štetom od divljih svinja na imanjima poljoprivrednika. Lovačko društvo „Jelen“ Gradačac, kao korisnik lovišta, prema Zakonu o lovstvu i Lovnoprivrednoj osnovi, organiziralo je razgonjenje štetočina u kojem su, pored lovaca, učestvovali i vlasnici imanja. Pored toga, da bi crna divljač ostala u staništu, imala dovoljno hrane i tako ne bi nasrtala na imanja, Društvo je intenziviralo prihranu, na način da je kupilo

16 hranilica koje su lovačke sekcije u aprilu postavili u lovištu gdje je stanište divljih svinja. Lovci su hranilice redovno punili i sa zadovoljstvom konstatarirali da su u velikoj mjeri ispunile svrhu, ali ne u potpunosti, radi čega su predsjednik Društva Djedović Miralem, lovnik Islamović Maid, lovočuvar Halilović Mustafa i sekretar Bećirbašić Enes, obišli neke oštećene zasade kukuruza, razgovarali sa vlasnicima i dogovorili zajedničke akcije razgonjenja divljih svinja radi sprečavanja većih šteta.

Fahrudin Gromić



Lovačko društvo „Jelen“ Gradačac

Pade vepar na Kosi

Grupa lovaca iz Sekcije „Vučkovci“, krajem prošle godine, na području Kose (Vučkovci), odstrijelili su vepa, a spretni i sretni strijelac je bio Kurbašić Nermin (stoji prvi sa lijeva).

Adil Turbić



Lovačko društvo „Jelen“ Gradačac

Remiza Cage

Krajem aprila, u rejonu Cage Lovačke sekcije „Međida Srednja i Gornja“, zasijana je kukuruzom parcela oko 10 dunuma. Zasijali su je lovci Sekcije Durmišević Ago i njegov sin Adnan.

Bajro Subašić





Savremeno lovno gazdovanje je zasnovano na primjeni svih raspoloživih tehnologija na kvalitetnom uzgoju i zaštiti divljači. Kao jedna od najprirodnijih tehnologija jeste i podizanje remiza za divljač, kao zasada višegodišnjih, jednogodišnjih ili mješovitih biljnih kultura za ishranu i zaklon divljači, kao i za odmor, gniježđenje, njegovanje mladunaca... Podizanje remiza nameće se i kao potreba za prehranu divljači kako bi se određena vrsta uspjela uzgojiti u željenom broju, a neosporan je značaj remiza na smanjenje šteta na obližnjim usjevima i voćnjacima koju divljač pravi. Remize mogu da se podižu na raznim staništima, čiji ekološki, orografski (nagib terena, okrenutost stranama svijeta) i edafski (hemijiske i fizičke osobine tla) faktori uslovljavaju izbor biljne kulture od koje će da se grade remize. U pravilu je bolje podizati pravougaone nego kvadratne remize, kao i više manjih nego jednu ili više većih. Udaljenost između remiza ne bi trebala prelaziti više od 500 metara.

Višegodišnje remize se podižu u vidu grupacija nasada drveća i grmlja. Njihovo podizanje je složenije, zahtijevaju više rada i redovnije održavanje u prvim godinama podizanja, dok u kasnijem dobu ne traže značajnije intervencije. Pogodne su kako za ravničarska, tako i za brdsko-planinska lovišta. Izbor vrsta drveća i grmlja za podizanje višegodišnjih remiza je uslovljen dobrim poznavanjem mikroekoloških karakteristika terena (vrsta tla, ekspozicija, hidrološke prilike) i ekologije same



biljke. Osnovna struktura ovih zasada treba da bude mješovitost u pogledu vrsta, gdje ćemo na malim rastojanjima imati grupe zasada četinarskih i lišćarskih vrsta, zatim vrsta s različitim plodovima, kao i vrsta s različitim periodima cvjetanja i plodonošenja. U praksi su se najbolje pokazale višegodišnje remize izgrađene po sljedećem modelu; uz ivicu remiza se sade niske žbunaste forme (divlja ruža, kupina, malina, kalina, trnjina, ogrozd, dren, i dr.), a kako se ide prema sredini remize tako se u redove sade vrste drveća koje će srazmjerno od kraja ka sredini da formiraju kosi sklop (lijeska, oskorusa, divlja kruška, divlja jabuka, džanarika, dud, iva, vrba, pitomi kesten, bagrem, grab, hrast, divlji kesten, lipa, jasika, i četinari, crni bor, smrča, i dr.). Kroz sredinu remize je potrebno formirati prosjeku širine od 3 do 5 metara, dok je razmak između redova uslovljen planiranim načinom kultivacije (okopavanje frezom, ručno okopavanje, i dr.) U prvoj godini od sadnje biljaka, potrebno je vršiti redovno okopavanje, i to u prosjeku na svakih mjesec dana, čime se obezbjeđuje sigurno sprečavanje nekontrolisanog rasta korova. Nakon tri godine njege, višegodišnja remiza je u potpunosti spremna da se brine sama o sebi, oslobađajući pri tome lovca od značajnijih intervencija.

Jednogodišnje remize se zasijavaju na čistinama unutar šumskog kompleksa. Najčešći tip takvih remiza na području djelovanja lovačkih društava TK jesu krmne remize, njive, oranice. One su slične poljoprivrednim kulturama s tom razlikom da težište nije na proizvodnji krajnjih poljoprivrednih proizvoda nego se nastoji divljači omogućiti neposrednu hranu tokom cijele godine. Jednogodišnje remize se sastoje od poljoprivrednih kultura, a u pravilu se rade na kvalitetnijem zemljištu. Nakon izbora lokacija remiza slijedi predstjetvena priprema (obrada tla) a što je uključuje oranje, tanjuranje, drljanje. Kvalitet i dinamika prirasta ovisi o svim ovim radnjama. Prinosi naravno ovise i o održavanju zasijanih površina. Treba voditi računa da vrste biljaka koje se siju mogu rasti zajedno. Podižu se kao samostalne ili u sklopu neke veće višegodišnje remize. Dobra strana im je da su u funkciji iste godine kad se podignu, a loša je da traju samo jednu sezonu, u principu dok je mraz ne polegne. Idealan je veći broj manjih remiza, veličine od 0,25 do 1 ha, ne uže od 15 m, da su mozaičnog rasporeda u sklopu veće višegodišnje remize.



Za oblikovanje jednogodišnjih remiza koriste se strne žitarice (pšenica, raž, zob, ječam), prosolike žitarice (kukuruz, sirak, proso, heljda), kulture za proizvodnju škroba i šećera (krumpir, šećerna repa), uljarice (soja, suncokret, uljana repica) te krmne kulture (stočni kelj, stočna repa, mrkva, stočni grašak i sl.). Dio jednogodišnjih remiza koje su zasađene biljkama postojećim na zimu (kukuruz), mogu se ostaviti na ugaru, a ukoliko se radi o većim površinama unutar njih mogu se zasijavati ostale kulture u obliku pojasa (žitarice, leguminoze i sl.). Na sjevernim stranama remiza koje se ostavljaju na ugaru može se posaditi čičoka, kojom se divljač također vrlo rado hrani.

Ukoliko se želi kvalitetno gospodariti krupnom divljači, krmne površine za divljač su neizostavni dio svakog lovišta. Njihova funkcija je podizanje hranidbene vrijednosti staništa, čime se smanjuje pritisak divljači na usjeve. Osim toga, dobrim remizama može se podići bonitet lovišta i omogućiti zaklon, omogućiti preživljavanje mladunčadi, odnosno povećavanje prirasta. U zatvorenim, šumskim lovištima oranične i travnjačke remize predstavljaju otvorene površine na kojima se može osmatrati i inventarizirati divljač, a povećava se uspjeh uzgojnog i redovnog odstrjela. Zbog sklonosti socijalnih vrsta divljači ka formiranju krda, dobrim rasporedom remiza u lovištu izbjegavaju se štete većih razmjera na poljoprivrednim kulturama.

Razlozi za osnivanje remiza su mnogobrojni, ali se nameće pitanje hoće li divljač, s obzirom na uobičajenu dostupnost hrane na poljoprivrednim površinama ili u šumskim područjima, posjećivati oranične remize i koliko dugo. Zato je vrlo važan odabir prostornog raspodjela površina pod remizama i bitna je ukupna zasijana površina u lovištu. Također, važno je uskladiti migraciju divljači s prostornim rasporedom remiza kako bi se ona glavninu vremena zadržavala na zasijanim površinama.

Vrlo je važno odrediti odgovarajuću površinu remize kako se migracija divljači ne bi opstruirala njezinim zadržavanjem na jednom lokalitetu.

Problem velikih lovišta je mala mogućnost preciznog evidentiranja brojnog stanja pojedine vrste divljači. Sijanjem djetelinsko-travnih smjesa na različito razmještenim površinama nastoji se privući krupnu divljač kvalitetnom hranom, između ostalog i u svrhu utvrđivanja brojnog stanja, utvrđivanja potencijalne trofejne vrijednosti pridolazeće divljači.

Bajro Subašić



Šumske voćke

Hrana i lijek za ljude i životinje

Šumske voćke doprinose bioraznolikosti šumskih ekosistema, a među najznačajnije šumske voćke spadaju pripadnice porodice ruža (lat. Rosaceae): divlja jabuka, divlja kruška, divlja trešnja, mukinja, jarebika, oskoruša, brekinja i rašeljka. Za sve šumske voćke je značajno da nose jestive plodove pa su zbog toga bitne za prehranu brojnih šumskih vrsta sisavaca i ptica. Vitamini u njihovim plodovima značajno pomažu životinjama u hladnim mjesecima. Također, zajednička je značajka voćarica da dolaze kao primiješane i pojedinačne vrste u šumskim sastojinama, rjeđe u manjim grupama.

Divlja ili šumska jabuka (*Malus sylvestris*)

Pojavljuje se pojedinačno ili u malim grupama. Može rasti kao grm, visine 3-5 m ili stabalce visine do 10 m. Kora je siva. Lišće je jajoliko, sitno nazubljenih rubova, dužine 4-8 cm. Cvjetovi su bijeli s nešto ružičastog obojenja ili ružičasti. Plodovi su okrugli i žutozeleni, promjera 2-4 cm. Prilično su kiseli, a sjeme sadrži spoj amigdalina koji je blago otrovan. Dobra je medonosna biljka i privlačna pticama za gniježđenje. Pomaže očuvati zdravlje životinja koje konzumiraju plodove, a koji su vrlo korisni i za ljudsko zdravlje. Konzumacija divljih jabuka pomaže zaspati, a učinkovita je kod izbacivanja oksalne kiseline u slučaju bubrežnog kamenca. Sirove ili pečene divlje jabuke



potiču mokrenje, pomažu u slučaju žutice, kod prikupljanja slobodne tekućine u trbušnoj šupljini (ascites), raznih oteklina, skleroze, primarne hipertenzije bez organskog uzroka, sklonosti stvaranja kamenca u bubrezima i mokraćnom mjehuru, glavobolje, nemirnog sna te bronhitisa. Kao izvor vitamina C najbolje ih je upotrebljavati kao kompot. Jabukovo sirće se preporučuje za liječenje unutarnjih organa, u slučajevima kao što su hronični gastritis i enterokolitis (upala kolona i tankog crijeva), poliartritis, giht, kolecistitis (upale žučnog mjehura), pretilosti, hipertenzije, angine, čira u ustima, u slučaju bubrežnih ili žučnih kamenaca te kod upale sinusa. Kao vanjska upotreba primjenjuje se za liječenje gnojnih rana, varikoznih vena, svrbeža izazvanog raznim uzrocima, crvenila, gljivičnih oboljenja, oboljenja kože i kose te u slučaju noćnog znojenja. Od drveta se mogu izrađivati manji predmeti i odlično je gorivo, a kora se može upotrijebiti za bojenje vune u crvenkasto-žutu.

Divlja kruška (*Pyrus pyraster*)

Dolazi kao pojedinačna vrsta u šumi. Poput divlje jabuke, manjeg je rasta, pa raste kao grm visine 3-4 m. Za razliku od domaćih, grane divlje kruške su trnovite. Lišće je jajoliko okruglo. Cvjetovi su bijeli. Plodovi su okrugli ili kruškoliki, promjera oko 4 cm i žuto-zelene boje. Zdrave su i korisne i za životinje i za ljude. Zahvaljujući bogatom hemijskom sastavu, divlja kruška je široko primjenjiva u liječenju, a koriste svježi ili sušeni plodovi, lišće i mlade grančice. Koristi se u slučaju upale prostate, dijareje, cistitisa, prehlade, kašlja, bolesti bubrega i mokraćnog sastava, arteroskleroze, pretilosti. Preparati od grančica i lišća kao i plodova imaju protuupalna i diuretična svojstva, pomažu kod skleroze, okrepljuju krvne žile, djeluju protubakterijski i



općenito čiste organizam. Blagotvorno djeluju na stvaranje krvi dovodeći do blagog alkaliziranja. Glikozid arbutin pokazuje protubakterijsko djelovanje na crijevnu mikrofloru, smanjuje upalu bubrega i mokraćnog mjehura i rastvara kamence u tim

organima. Zahvaljujući dostupnosti flavonoida plodovi imaju antioksidativna svojstva i smanjuju upale izazvane djelovanjem slobodnih radikala. Karotenoidi pomažu jačanje krvnih žila. Svježi listovi i sirovi plodovi primjenjuju se na koži kod upala za zaustavljanje krvarenja i u slučaju herpes zoster. Grančice sadrže tvari koje čiste koštani sastav od radijacije.

Divlja trešnja (*Prunus avium*)

Znanstveni naziv ove voćke upućuje na činjenicu da se ptice rado hrane njezinim plodovima. Uglavnom dolazi pojedinačno. U šumarskoj literaturi istaknuta je kao najznačajnija



predstavnicu porodice ruža u Evropi. Naraste oko 20 m u visinu. Kora je u mladosti glatka, smečkasto-crvena s uočljivim sivo-smeđim lenticelama, s vremenom deblja, smeđi i raspucava. Lišće je obrnuto jajoliko, izduženo jajoliko ili eliptično, ušiljenog vrha i dužine oko 12 cm. Cvjetovi su bijeli, dvospolni i na dugim peteljka. Plodovi su okrugli, tamnocrveni, mesnatog ploda. Njezino lijepo i iznimno kvalitetno drvo koje poprima boju meda nakon izlaganja zraku, koristi se u proizvodnji namještaja. Preporučuje se uzgajati u mješovitim šumskim zajednicama. Koristi se kao podloga za kalemljenje mnogih sorti trešanja i višanja čime se čuva bioraznolikost. Poznata je kao narodni lijek.

Mukinja (*Sorbus aria*)

Raste kao spororastući grm ili stabalce visine 10-15 m. Lišće je okruglo, dvostruko nazubljenih rubova, kožasto, tamnozeleno s gornje strane i bjelkasto s donje, dužine 6-12 cm. Cvjetovi su bijeli, krupni. Plodovi su crveno-narančasti, okruglo-jajoliki



i vrlo privlačni pticama i medvjedima, jestivi su za ljude, ali trpk. Plodovi su jestivi ali su brašnastog okusa. Koriste se obično prerađeni, kao marmalade ili sok. Mukinja je poznata kao narodni lijek protiv proljeva, kataru pluća i kašlja.

Jarebika (*Sorbus aucuparia*)

Omanje stablo visine 15-20 m. Kora zrelih stabala je glatka, sjajna, svijetlo sivo-smeđe ili žuto-smeđe boje. Lišće je dužine do 20 cm, neparno perasto sastavljeno 7-15 usko eliptičnih listića, s gornje strane tamnozelenih, s donje bjeličastih i koji



u jesen poprimaju tamnožutu, narančastu ili svijetlocrvenu boju. Cvjetovi su mnogobrojni, bijeli i neugodna mirisa. Plodovi su okrugli, narančasto-crveni, širine oko 1 cm. Kao i plodovi mukinje privlačni su pticama, a ljudima se preporučuje kuhanje u vreloj vodi. Koristi se kao narodni lijek, kao adstringent, antidijaroik, antimikrobik, antireumatik, sntiseprik, antiskorbutik, antitusik, digestiv, dijabetik, diuretik, holagog, pargativ. Zbog lijepih narančastih listova u jesen i crvenih plodova vrlo je cijenjena u vrtlarstvu.

Oskoruša (*Sorbus domestica*)

Spororastuće stabalce visine 15-20 m, rjeđe 30 i promjera debla do 1 m. Kora mladog drveća je smeđa i glatka, a sa starenjem tamni i uzdužno raspuca. Lišće je dužine 15-25 cm, neparno perasto sastavljeni 13-21 listića, dužine od oko 5 cm,



duguljasto ovalnih ili ovalno okruglastih, svijetlozeleni s gornje strane, s donje strane plavkasto-zeleni, a u jesen žuti ili žuto-narančasti. Cvjetovi su bijeli, promjera 13-18 mm. Plodovi su dužine 2-3 cm, žuto-zeleni, često jarkocrveni na osunčanoj strani. Hrana je pticama, divljači i glodavcima. Oskoruša dobro podnosi sušu i hladnoću (do -30°C). Upotrebljava se kao narodni lijek, a najprije se pravi ljekoviti napitak od 0,5 kg soka oskoruše, pomiješanog s 0,5 kg meda i taj se napitak koristi za osvježanje i za jačanje organizma. Namirnica je za hranu, a u stolariji se koristi za izradu muzičkih instrumenata budući da joj je drvo čvrsto, a elastično i dekorativno.

Brekinja (*Sorbus torminalis*)

Stablo je visine do 25 m, obično do 12 m. Kora je siva, starenjem tamni i nepravilno raspuca. Lišće je dužine do 18



cm i širine do 10 cm, s 3 do 5 lapova i podsjeća na javorovo, tamnije zelene boje s gornje strane i svjetlije s donje strane. Cvjetići su promjera 6-8 mm s bijelim laticama. Plodovi su okrugli ili jajoliki, promjera 8-12 mm, smeđe-žuti ili crveno-žuti i s bijelim točkicama, a sadrže od 1 do 3 sjemenke. Ptice i divljač vrlo rado jedu plodove, a srneća divljač sklona je brštenju lišća. Poznata je kao ljekovita biljka. Brekinja je prirodni inzulin - čaj od kore drveta brekinje je dobar za dijabetičare. Za čaj se koristi mlada kora ili masa ispod kore. Plodovi brekinje sadrže dosta trjeslovina, pa se koristili kao lijek za dizenteriju i sve oblike proljeva. Čaj se pije i za izbacivanje pijeska i kamenaca iz bubrega. Drvo brekinje je vrlo cijenjeno za izradu muzičkih instrumenata.

Rašeljka (*Prunus mahaleb*)

Krupniji grm ili omanje stablo visine do 12 m. Kora je tamnosiva i specifična mirisa. Lišće je gotovo okruglo sitno nazubljenih rubova, s gornje strane sjajno i tamnije zeleno i svjetlije sa žućkastim tonom na donjoj strani, dužine 9 cm. Cvjetići su bijeli. Sočni plodovi promjera su 1 cm, okrugli, najprije žuti, s vremenom crvene, a kad sazriju poprimaju crnu boju. Plodovi su jestivi (koštice u njima su otrovne), slatkastogorki, ljudi ga uglavnom ne konzumiraju, ali je važan



izvor hrane za više vrsta ptica i divljači. Od davnina se rašeljka koristi u narodnoj medicini. Različiti dijelovi, tj. njihovi ekstrakti imaju antibakterijsko, antifungalno, antimikrobno, antioksidativno i protuupalno djelovanje. Plodovi imaju veliki potencijal u industrijskoj proizvodnji kao izvor fenola, šećera, antioksidansa, ali i izvor za dobivanje prirodnih bojila te ulja iz sjemenki koje se upotrebljava u proizvodnji lakova i u farmaceutske svrhe. Drvo je tvrdo i pogodno za izradu manjih predmeta.

Od ostalih rodova važno je spomenuti pitomi kesten, šumski kesten (*Castanea sativa*) iako se ne smatra u potpunosti šumskom voćkom. Plodovi pitomog kestena izuzetno su korisni za ljude i šumske životinje. Osim jestivih i ljekovitih plodova, u ljekovite svrhe se koriste i listovi kestena. Sadrži treslovine, flavonoide, šećer, smolu, pektin, kalij i natrij. Iz plodova se dobiva ulje koje liječi bronhitis, kašalj, astmu i bolesti dišnih organa. Zbog njegova izvrsna ukusa peče se ili kuha te je cijenjen u kulinarstvu. Pitomi kesten jestiv i ljekovit, a divlji se koristi samo u medicinske svrhe. Plodovi pitomog kestena čiste krv i jačaju imunitet i izvor su energije te sadrže magnezij, kalcij, fosfor, željezo i skoro sve skupine vitamina B. Listovi kestena sadrže 95% tanina, razne esencijalne smole i vitamin K koji se pokazao vrlo djelotvornim kod zaustavljanja krvarenja.

Ljekovit je i listopadni grm, ili niže stablo, lješnjak (*Coryllus avellana*). Lješnjak ili lijeska prirodni je adstringent, antidijaroik, antiflogistik, antiholecistopatik, antipiretik, depurativ, dijaforetik, febrifug, holeretik, roborans, stomahik, tonikum.

Treba pomenuti i rujevinu (*Cotinus coggygria*), koja također nije šumska voćka ali jeste izuzetno ljekovit biljni rod iz porodice rujevki, kojem pripada sedam vrsta grmlja i drveća. Rujevina je spas za bubrege, prostatu i urinarne infekcije. Ova biljka se koristi i za suzbijanje dijareje, protiv paradentozе, hemoroida, čira na želucu, bakterija, bolesti mjehura, gubitka kose i znojenja. Njeni ljekoviti dijelovi su list i kora.

Damir Huremović



Period od juna do septembra je u znaku lova na srndaća u lovištima Tuzlanskog kantona. Isto tako, lovačka društva, radi postizanja optimalne trofejne vrijednosti i održavanja zdrave populacije srneće divljači, imaju obavezu organizirati i sanitarno-uzgojni odstrjel ženki i lanadi srneće divljači, obično u periodu od početka oktobra 2021. do kraja januara sljedeće godine. Mnogi lovci ističu da im je lov na srndaća jedan od najomiljenijih, što se može obrazložiti činjenicom da je ovaj lov „lagan“ te da se izvodi kad su pogodne vremenske prilike. S druge strane, veliki broj lovaca nije svjestan odgovornosti koju nosi pri lovu na srndaća. Naime, lovac sa svakim odstrjelom srndaća sprovodi intenzivnu uzgojnu mjeru, koja, ukoliko je pogrešna, može dovesti do značajnog poremećaja u populaciji. Zbog navedenog, lov srneće divljači se vrši probirnim odstrjelom (čekanjem ili šuljanjem), uz korišćenje optičkih pomagala (dvgled, optički nišan). Svaki lovac bi trebalo da zna da srneća divljač nema izraženu prirodnu sklonost dobrovoljnog odlaska sa staništa gdje je rođena, što znači da loše sprovedena uzgojna mjera na određenom području ostavlja posljedice uglavnom samo na tom području.



Cilj odstrjela

Zadaci probirnog odstrjela nisu laki, naročito ako treba znatno popraviti prenamnoženu i kvalitativno lošu populaciju divljači. Od vremena kad je nastao pojam probirni odstrjel, interesovanje lovaca je uglavnom sužavano samo na jake trofeje i to u što većem broju. Zato je probirni odstrjel srndaća shvatan većinom samo kao ocjenjivanje srndaća za odstrjel pretežno prema rogovlju. Jako rogovlje srndaća može da budu proizvod samo jakog i zdravog tijela, a jake i zdrave jedinke se rađaju samo u zdravoj i, s obzirom na stanišne uslove, ne previše brojnoj populaciji divljači. Osnova probirnog odstrjela zato leži kako u regulisanju brojnosti populacije i njene strukture, tako i u stalnom eliminisanju svih slabih grla koja ne ulivaju nadu, počev od srna i njihovog potomstva pa do srndaća, tako da u populaciji ostanu i da se razmnožavaju samo najjače, najkvalitetnije i najperspektivnije jedinke. Ako nam je cilj da u populaciji imamo samo grla s najboljim nasljednim osobinama, neophodno je da nepoželjne jedinke eliminišemo odmah ili što prije, čim ih upoznamo kao takve. Zato je glavno načelo probirnog odstrjela izlučiti sve nepoželjne jedinke u što mlađem uzrastu – „što prije, to bolje“. Iskusni lovni stručnjaci navode da je bolje napraviti grešku u probiranju u mlađem uzrastu nego na srednjodobnim grlima. Međutim, veoma često se među lovcima može čuti komentar da ne treba odstrjeljivati „šiljkane“.





Ocjenjivanje starosti

Osnov za ocjenjivanje srndaća pri probirnom odstrjelu predstavlja pouzdano ustanovljavanje (što približnije) starosti jedinke, a što se sprovodi kroz ocjenu tjelesne građe, držanja tijela, obojenost (naročito glave u ljetnoj dlaci) i vrijeme mijenjanja dlake, i na kraju opće ponašanje životinje. Na rogovlju je najvažniji znak ocjene starosti vrijeme potpunog čišćenja, a najmanje pouzdan znak starosti su oblik i masivnost rogovlja. Dosta pouzdan znak ocjene starosti srndaća jeste obojenost glave, gdje se sa starošću mijenja i boja, a prema sljedećim pravilima: malo lane ima od rođenja u ljetnoj dlaci glavu skoro jednoličnu, nekad svjetlije, a nekad tamnije mrkosivo obojenu. Ova obojenost uglavnom ostaje i u jednogodišnjih grla, ali se kod jednogodišnjaka iznad nozdruva ističe bijela mrlja, koja je ponekad slabo naznačena. Kod dvogodišnjih srndaća čisto bijela mrlja iznad nozdruva je znatno šira i dostiže ponekad čak polovinu rastojanja između nozdruva i spojnice prednjih krajeva očiju. Čelo srndaća dvogodišnjaka je tamno, zbog čega usljed vidljivih granica između boja glava dvogodišnjeg srndaća djeluje šareno. Nosna bijela mrlja se sa godinama dalje širi, ali gubi svoju jasno bijelu boju i postepeno proniče u okolnu tamnu dlaku i tako gubi svoju raniju granicu. U dozrijevajućih trogodišnjih i četvorogodišnjih srndaća navedena bijela mrlja postaje sve veća i manje izražena od okolne dlake, zauzimajući približno od pola do tri četvrtine prostora između nozdruva i očiju. Čeona boja kod ove kategorije takođe postaje sivlja. Od pete godine bijela mrlja iznad nozdruva se postepeno rasplinjuje prema čelu i proniče u tamniju boju ostalog dijela glave, dok prvobitnu tamnu čeonu mrlju prorastaju svjetlije dlake. Zdrav i dobro razvijen godišnjak mijenja dlaku prije svih ostalih srndaća, te po pravilu posljednji čisti rogovlje. Rijetko ih očisti u maju, a po pravilu oni najperspektivniji godišnjaci, kojima jaki parogovi rastu duže, rogovlje očiste ponekad čak u julu. U praksi se dešava da lovac izvrši odstrjel srndaća u junu, a da on još nije skinuo bast, uz obrazloženje da je riječ o „škartu“, što je svakako velika greška. Pravilo je da zreli srndaći najranije očiste rogovlje. Sve navedeno ukazuje na to da je za uspješan lov srndaća neophodno poznavati svako grlo, te kod izvođenja odstrjela pravilno odabrati grlo za odstrjel. Nažalost, česta je praksa da lovac puca na prvo grlo koje mu izađe na nišan, a nerijetko



lovac u lovu na srndaća ne posjeduje dvogled. Generalno, lov ove plemenite vrste divljači se sprovodi kroz uzgojni, sanitarni, redovni (trofejni) i redukcionni odstrjel, čije bi osnove trebalo da poznaje svaki lovac.

Uzgojni odstrjel

Uzgojni odstrjel podrazumijeva izlučivanje iz lovišta oba pola srneće divljači koja su zakržljala i prestarjela te muška grla sa slabim trofejima, odnosno grla koja su nepoželjna za razmnožavanje. Ovim odstrjelom se reguliše odnos polova, starosna struktura, zdravstveno stanje, kvalitet trofeja i



ekonomski kapacitet lovišta. Pri uzgojnom odstrjelu srndaća na prvom mjestu se odstrjeluju oštećeni srndaći, zatim srndaći



u opadanju, manje tjelesne težine i slabijeg rogovlja u svim starosnim kategorijama. Tek oko četvrtine od predviđenog odstrjela činit će i zreli srndaći, koji bi trebalo da imaju dobru trofejnu vrijednost i to su „plodovi“ uzgajivačkog rada. Dobri poznavaoци ove vrste divljači prilikom uzgojnog odstrjela gotovo da ne mogu napraviti grešku. Ovakvim vidom odstrjela daje se šansa najboljima da ostave potomstvo, što znači kvalitetniju lanad, a samim tim i kvalitetniju populaciju matičnog fonda. Dobra i jaka muška grla treba odstrijeliti tek po završetku parenja u tekućoj lovnoj godini, da bi ostvarila još jednu generaciju potomstva.



Sanitarni odstrjel

Sanitarni odstrjel podrazumijeva izlučivanje iz lovišta oštećenih, bolesnih i na bolest sumnjivih grla, koja svojim izgledom i ponašanjem na to upućuju. Ova mjera se sprovodi zbog nemogućnosti liječenja bolesti, a svi odstrijeljeni bolesni primjerci i njihovi odgovarajući dijelovi treba da se dostave veterinarskim ustanovama na pretragu ili da se zakopaju. Sanitarni odstrjel se može sprovoditi kao krajnja mjera i na zdravim primjercima, u slučaju da se sigurno ustanovi zarazna bolest koja se prenosi međusobnim kontaktom divljači. U skladu sa navedenim uzgojnim i sanitarnim odstrjelom iz lovišta treba odstraniti: Lanad – oba pola koja su kržljava, mršava, jako rano ili

jako kasno olanjena, kod blizanaca ona slabija, lanad s tjelesnim nedostacima, bolesna, ranjena, povrijeđena, iscrpljena bolešću. Podmladak grla starosti jednu-dvije godine kad su slaba, zaostala u porastu i razvoju, bolesna, ranjena ili povrijeđena. Muška grla sa slabo razvijenim rogovljem, uskim ili jako širokim rasponom rogovlja, deformisanim rožištem, rogovljem u vidu „perike“ ili „kvrge“, s tankim i kratkim rogovljem. Ovdje treba voditi računa o srnama dvizicama koje treba maksimalno štedjeti, kao i vrijedna muška grla koja su pravilno razvijena sa





dobrim budućim trofejima. Srednjodobna grla – starosti tri-četiri godine koja su se sa navedenim nedostacima „provukla“ kroz klasu mladih grla. Srednjodobna ženska grla koja se pare jako rano ili jako kasno i tako produžavaju period parenja, što jako negativno djeluje na kondiciju srndaća, „jalove“ i one srne koje vode slabu lanad, zatim ranjene, povrijeđene i bolesne srne. Kad se odstrjeljuje srna koja vodi lane, odstrjeljuje se i lane, ali tako da se najprije odstrijeli lane, pa onda srna. Srednjodobna muška grla u ovoj starosnoj klasi se izlučuju kad nemaju trofej u kategoriji „šesterca“, sa slabo razvijenim rogovljem nepravilnog oblika, s jako oštrim parošcima ili jako tupim – trulim vrhovima



parožaka, kad su ranjena, povrijeđena i bolesna. S obzirom na to da u ovoj klasi starosti muška grla pokazuju kakav će dati trofej, uzgojni odstrjel u ovoj klasi starosti je najintenzivniji. Zrela grla – oba pola kad su tjelesno oslabila bez obzira na uzroke, zatim ranjena, povrijeđena i bolesna grla, te srne koje se lane rano ili kasno i koje vode slabu lanad. Sprovedenju mjera uzgojnog i sanitarnog odstrjela treba posvetiti posebnu pažnju u smislu angažovanja najiskusnijih i najstručnijih lovaca, uz sprovođenje maksimalnog nadzora.

Redovni (trofejni) odstrjel

Redovni (trofejni) odstrjel podrazumijeva izlučivanje iz lovišta prvenstveno muških grla koja nisu bila obuhvaćena uzgojnim odstrjelom, a tek onda normalno razvijenih i zdravih

trofejno vrijednih grla. Ovaj odstrjel predstavlja „žetvu“ dobro gajene divljači koja, pored trofeja, daje meso i kožu. Dobra i jaka muška grla u redovnom odstrjelu treba odstrijeliti tek po završetku parenja u tekućoj lovnoj godini, da bi ostvarila još jednu generaciju potomstva. Smatra se da ukupan broj ovih grla u toku godine iznosi tek četvrtinu od ukupnog broja srndaća planiranog za odstrjel. Što se tiče vremenskog sprovođenja odstrjela, treba se pridržavati pravila da se uzgojni odstrjel sprovodi u toku lovne sezone, a sanitarni tokom cijele lovne godine, dok se redovni odstrjel sprovodi takođe u vrijeme lovne sezone.



Redukcioni odstrjel

Redukcioni odstrjel, koji podrazumijeva odstranjivanje suvišnih grla oba pola, primjenjivat će se kod pojave viška grla iznad ekonomskog kapaciteta u lovištu.

D.J.



IN MEMORIAM



Salim (Salih) Trumić zv. Mrki
(1963. – 2021.)

Nakon duge borbe za život nakon nesreće na poslu na Ahiret je preselio naš Mrki, omiljeni i poštovani član LD „Jelen“ Gradačac. Širokogrudan, disciplinovan, vrijedan, ljubitelj prirode, lova i druženja bio je voljen i cijenjen, zbog čega će nedostajati svima koji su ga poznavali, a naročito lovcima iz njegove Sekcije „Vučkovci“. Neka mu je vječni rahmet.

LD „Jelen“ Gradačac



Omer Selmanović
(1949.-2021.)

Lovačko društvo „Spreča“ Kalesija je ostalo bez vrijednog i uzornog lovca i druga, bez svog Omera, koji se posebno isticao u aktivnostima zaštite divljači. Za svoj doprinos razvoju lovstva više puta je odlikovan, a SLD TK mu je 2009. godine uručio diplomu počasnog člana. Ostat će u sjećanju svim lovcima Društva, a posebno članovima iz Sekcije „Kalesija“ u kojoj je djelovao. Neka mu je vječni rahmet.

LD „Spreča“ Kalesija



Mladen (Rastko) Stokanović
(1950.-2021.)

U sedamdeset i prvoj godini života redove LD „Tuzla“ zauvijek je napustio naš Mladen. Dao je golem doprinos unaprjeđenju lovstva i lovačke etike. Sve povjerene mu dužnosti obavljao je časno, s mnogo ljubavi i odgovorno. Kao dobar čovjek i lovac, cijenjen i poštovan, zauvijek će ostati u sjećanjima svih onih koji su ga poznavali, a osobito članovima iz Sekcije „Gornja Tuzla“ u kojoj je djelovao. Pokoj mu duši.

LD „Tuzla“ Tuzla



Muhamed Beširović
(1951.-2021.)

Lovačko društvo „Spreča“ Kalesija je ostalo bez svog Muhameda vrijednog i uzornog lovca i druga, kome smo zahvalni zbog njegovog doprinosa na unapređivanju kalesijskog lovstva. Za taj svoj rad odlikovan je bronзанom lovačkom značkom, a SLD TK mu je 2015. godine uručio diplomu počasnog člana. Ostat će u sjećanju svim lovcima Društva, a posebno članovima iz Sekcije „Kalesija“ u kojoj je djelovao. Neka mu je vječni rahmet.

LD „Spreča“ Kalesija



Dr. Suvad (Mustafa) Dedić
(1960. – 2021.)

Nakon kraće bolesti, u 61.-oj godini života, na Ahiret je preselio dugogodišnji član LD „Zelemboj“ Banovići, naš doktor Suvad, načelnik Klinike za plućne bolesti UKC Tuzla i profesor na Medicinskom fakultetu u Tuzli. Osim što se dokazao kao zdravstveni radnik bio je i uzoran član LD „Zelemboj“ Banovići. Više puta je odlikovan za svoj doprinos u unapređivanju lovstva. Kao ugledan, primjeren lovac i prijatelj, ljubitelj prirode i druženja ostat će zauvijek u sjećanju svim lovcima Društva i svim lovcima Tuzlanskog kantona.

LD „Zelemboj“ Banovići



Marko (Ivan) Vareškić
(1949.-2021.)

U sedamdeset i drugoj godini života redove LD „Tuzla“ zauvijek je napustio naš Marko. Njegovim odlaskom izgubili smo dragog, cijenjenog kolegu i istinskog zaljubljenika u lov i lovačka druženja. Kao lovac koji potiče iz lovačke porodice, čiji je sin aktuelni predsjednik Društva, uzor je kako treba poštovati lovačke običaje i obaveze. Nemjerljiv je njegov doprinos lovstvu zbog čega je više puta nagrađivan, a SLD TK mu je uručio diplomu počasnog člana. Trajno će ga se sjećati svi koji su ga poznavali, a naročito lovci iz njegove Sekcije „Dobrnja-Mramor“. Pokoj mu duši.

LD „Tuzla“ Tuzla

